

Թերի թափել 'ի նոցանէ : Սակայն Հայք գիտէին թէ առանց կնքոյ եւ գրոյ Մուվէլլային՝ չգործէր օգուտ ինչ իւր մի Դատաւորին . զի նա էր վերատեսուչ գործոյն հրամանաւ Արքայի , և յայտնի գիտացեալ թէ չունի կատարիլ գործն ձեռամբ նորին , 'ի բաց կացին 'ի նմանէ :

Կոչեալ զնոսա առաջի իւր Նուրի Էֆէնտի , յայտնապէս ասէր՝ թէ գործս այս չկատարի աստ . զի 'ի տուրս առաւել են Յոյնք քան զՀայս , և ակներեւ տեսանի թէ Կուսակալն , Դատաւորն և այլազգիք քաղաքիս առաւել ունին նեղել զձեզ պաշտպանելով զՅոյնս , և գանձիւք վճարել զգործն ընդդէմ է հրամանի Արքային , վասն որոյ դուք գրեցէք առանձին մի ըստ միով զամենայն զեղեալսն առ գլխաւորս ազգին ձերոյ , և ես գրեցիք զամենայն զոր միանգամ տեսի և լուայ առ գլխաւոր վերատեսուչ գործոյ Պաշնադճի Զատէ Զէքի Էֆէնտի և նա անխտիր խորհրդակցելով ընդ մեծի Գենպետին , և 'ի միասին զամենայն ինչ յանդիման կացուցանեն առաջի Արքայի . յայնժամ ելանէ անտի հրաման հզոր և կատարին ամենայն խնդիրք ձեր : Հաճոյ թուեցաւ այս բան Հայոց , և գրեցին :

Ի սմին ժամանակի յարեաւ Խօճաքեանն գնալ 'ի Կոստանդինուպօլիս . Հայք մեղադրէին զնա եւ ասէին . դու Ոստիկան կարգեալ 'ի կողմանէ Տէրութեան , զիւրդ անկատար թողեալ զգործն փութաս մեկնիլ աստի : Եւ նա պատճառէր զերկարիլ գործոյն , զանհաստատ միտս Դատաւորին , երթալ ծանուցանել զայս ամենայն ասէր Կուսակալին . եթէ ոչ կատարեսցի անդ , փութալ 'ի Կոստանդինուպօլիս եւ յայտ առնել Արքայի և սպասել հրամանի նորին . չծանրանալ իւր ծախիւք 'ի վերայ Հայոց , և զժամանումն աւուրց հասանելոյ իշխանութեան , զոր խոստացեալ էին 'ի Դրանէ , այլովքն Հանդերձ : Յորդորէր զնա եւ Նուրի Էֆէնտի ունկնդիր լինիլ բանից իւրոց , չթողուլ զգործն անկատար եւ տարաժամ մեկնիլ , թերեւս բարկացի Արքայ . այլ նիստ աստ ասէր , զի ծանուցուք Արքայի և ըստ հրամանի նորին գործեսցուք . այլ ես ասէ ոչ մեկնիմ աստի յուսացեալ 'ի զօրութիւն առաքչին իմոյ , այլ ծանուցանեմ եւ սպասեմ պատասխանեոյ : Զէր հնար Խօճաքեանին մնալ յերուսաղէմ . զի գիտութեամբ Դա-